

Kino ambulat per pign e grond

■ (ma) La gievgia vargada ha il kino ambulont «Roadmovie» mussau films cuorts e liungs a Curaglia. Il suentermiezdi han ils affons astgau guder l'atmosfera da kino e s'informar davart las tecnicas differentas dil film. La sera han ils carschi saviu far diever dalla puschida gratuita cun il film svizzer «Au sud de nuages». Il kino ambulont Roadmovie semetta onn per onn sin viadi en regiuns senza kino e muossa films svizzers. L'uniun buca commerciala vul promover la producziun da films svizzers, il brat da cultura denter las regiuns linguisticas ed enrihir la puschida culturala en regiuns ruralas.

Il suentermiezdi dalla sonda vargada han rodund 45 affons dalla Val Medel mirau cun fascinaziun plirs films cuorts. Mintga film ei vegnius producius cun tecnica unica. Il team da Roadmovie ha presentau e declarau mintga tecnica als affons che han contemplau cun eglis gronds las produziuns cun figuras da teila, animaziuns da computer ni era films d'animaziun dessignai. «Nus lein presentar als affons las differentas tecnicas da far films ed era mussar che quellas influenzeschan l'impressiun d'in film», ha John Wäfler dil team da Roadmovie detg. Ils affons han giu grond plascher ed interess pils films, per las differentas tecnicas ed era pils apparats ed utensils da kino. «Ei fa plascher da presentar films ad affons, els ein adina in publicum sin-



John Wäfler dil team da Roadmovie declara als affons la tecnica d'in apparat da projecziun.

FOTO M. ALBIN

cer ed engrazieivel», descriva John Wäfler sia lavur cun affons.

Bun'atmosfera malgrad pign publicum

La sera era il diember d'aspectatur meins gronds che durent las presentaziuns pils affons il suentermiezdi. Quels paucs ch'ei stai presents han schau plascher il film svizzer «Au sud de nuages» da Jean-François Amiguet e beneventau igl engaschi dil team da Roadmovie. Ei seigi donn che buca pli biars hagian priu la caschun da prender part a quella sera excepziunala. «Tier ina tala puschida

havessel jeu spitgau dapli glied», ha Arnold Flepp dalla suprastanza communal da Medel detg.

Ils presents, affons e carschi, han astgau guder ina sera da kino speciala. La ramur dil projectur da 16 millimeters, popcorn e placats da film dessignai dils affons da scola da Curaglia e contorn han procurau per la dretga atmosfera. En in onn cura ch'il team da Roadmovie ei puspei sin viadi, ein forsa era films romontschs el program. «Nus essan aviarts per tut e lein era cumpletar nies program cun films romontschs», di John Wäfler.